

&gt;&gt; BERITA &gt; NASIONAL &gt; Manfaat ekonomi digital dalam perdagangan Malaysia-China

# Manfaat ekonomi digital dalam perdagangan Malaysia-China

|| 14 Oktober 2021



Ismail Sabri - Foto Bernama

KUALA LUMPUR - Ekonomi digital, Revolusi Perindustrian Keempat (4IR) dan pelaksanaan pembangunan mampan adalah 'bahagian utama dengan potensi ekonomi yang belum dimanfaatkan' dalam perdagangan dua hala antara Malaysia dan China, kata Perdana Menteri, Datuk Seri Ismail Sabri Yaakob.

Beliau berkata, ketiga-tiga bahagian ini mempunyai potensi ekonomi yang belum dimanfaatkan walaupun pelaburan dan perdagangan dua hala antara kedua-dua negara berkembang pesat sejak 2009, yang mana China terus menjadi rakan dagangan terbesar Malaysia, menyumbang 18.6 peratus daripada jumlah perdagangan pada 2020.

Ismail Sabri berkata demikian dalam ucapan pembukaan beliau semasa majlis pembukaan Pameran Import dan Eksport China ke-130 (Pameran Canton) yang diadakan secara maya di sini pada Khamis.

Menyentuh mengenai ekonomi digital, beliau berkata, Malaysia telah melancarkan inisiatif MyDIGITAL awal tahun ini untuk mempercepat lagi transformasi digital negara.

Inisiatif tersebut yang disasarkan menarik pelaburan digital domestik dan juga antarabangsa bernilai AS\$17.32 billion (AS\$1= RM4.15), akan dilaksanakan menerusi Rangka Tindakan Ekonomi

Digital Malaysia, dan berfungsi sebagai sebahagian daripada rancangan kerajaan untuk mempercepat kemajuan negara sebagai ekonomi maju dari segi teknologi menjelang 2030, katanya.

Mengenai 4IR, Ismail Sabri berkata, Malaysia telah memulakan usaha ke arah pendigitalan yang lebih meluas dengan lebih banyak usaha akan dilaksanakan seperti memanfaatkan sinergi kedua-dua dunia fizikal dan digital untuk meningkatkan daya saing Malaysia.

"Atas alasan ini, kami telah melancarkan 4IR, yang dibangunkan berdasarkan kepada pendekatan keseluruhan negara menerusi perkongsian rakyat-swasta-awam.

"Ini termasuk membangunkan prasarana yang bersandarkan 4IR bagi penggunaan teknologi lebih meluas di samping melaksanakan pendekatan kawal selia yang efektif, yang mana kesemuanya bertujuan memenuhi keperluan perniagaan dalam ekonomi digital serta mempercepat inovasi dan adaptasi dalam teknologi," katanya.

